

Headline IPTA perlu jadi gedung lahir atlit
Date 02. Jun 2008 Language MALAY
Media Title Berita Harian Page No 26
Section Sukan Article Size 184 cm2
Circulation 217920 Frequency Daily
Readership 2083000 Color Full Color



IPTA perlu jadi gedung lahir atlit

MENTERI Pengajian Tinggi, Datuk Seri Mohamed Khaled Nordin tidak mahu mahasiswa Institusi Pengajian Tinggi Awam (IPTA) menganggap institusi berkenaan hanya sebagai medan menimba ilmu demi segulung ijazah.

Hakikatnya, saya bimbang dengan sikap pelajar, apa lagi ibu bapa yang terlalu menekankan pencapaian akademik anak-anak mereka hinggakan soal-soal seperti sukan, kegiatan kokurikulum dan perkara lain membabitkan kerja sosial diketepikan.

Kenyataan menteri berkenaan banyak kebenarannya kerana IPTA bukan lagi institusi untuk menimba ilmu akademik semata-mata. Banyak kemudahan rekreasi, sukan dan kegiatan sampingan disediakan untuk menjadikan mahasiswa berkebolehan dalam pelbagai bidang.

Justeru, tidak keterlaluan jika Kementerian Pengajian Tinggi mahu masyarakat, khususnya mahasiswa mengikis tanggapan kononnya IPTA adalah 'kubur' bagi penuntut yang aktif bersukan.

Ke arah merealisasikan usaha ini, sukan Majlis Sukan Universiti Malaysia (Masum), diadakan di Universiti Malaysia Sabah (UMS), Likas, Kota Kinabalu minggu lalu yang mendapat sambutan di luar dugaan dengan penyertaan lebih 2,000 peserta yang mewakili 20 IPTA dalam 11 acara termasuk tenis, bola keranjang, bola jaring, bola tampar, ragbi, futsal, catur, golf, ping pong, memanah dan taekwando.

Sebenarnya, sudah terbukti, IPTA mampu menghasilkan atlit untuk mewakili negara ke kejohanan utama. Sebagai contoh, Mohd Azlan Mubin dalam acara sepak takraw, M Jivan (hoki) dan Che Chew Chan (taekwando).

Bahkan, seperti kita ketahui, beberapa atlit lain turut mencatatkan nama cemerlang apabila enam mahasiswa dari Universiti Putra Malaysia (UPM) iaitu Roslinda Samsu (olahraga), Chee Chan dan Elaine Teoh (taekwondo), Cheng Chu Sian dan Wan Mohd Khalmizan Wan Abdul Aziz (memanah) dan Leong Mun Yee (terjun) melayakkan diri secara merit untuk mewakili negara di Sukan Olimpik Beijing Ogos depan.

Saya berpendapat pendedahan untuk mahasiswa yang berpotensi tidak seharusnya melalui Masum semata-mata kerana Sukan Malaysia (Sukma) juga harus mempunyai wakil, sekurang-kurangnya sebagai pasukan undangan.

Kedudukan ini akan memberikan keyakinan dan kepuasan kepada mahasiswa dan ibu bapa bahawa IPTA adalah institusi terbaik bagi atlit mengembangkan bakat sukan selepas alam persekolahan.

Dengan usaha kementerian menggalakkan lebih ramai penuntut IPTA bergiat aktif dalam sukan dengan menyediakan biasiswa, saya yakin IPTA akan mampu menghasilkan lebih ramai atlit berwisata, selaras dengan keputusan Jawatankuasa Kabinet Mengenai Pembangunan Sukan yang mahu kemajuan sukan terus diperkukuhkan di IPTA dengan harapan mewujudkan kalangan 'atlit yang aktif dan berfikir' selari dengan matlamat memajukan modal insan.